



Tužilaštvo - Tužiteljstvo Bosne i Hercegovine  
Тужилаштво Босне и Херцеговине

*Broj: T20 0 KTRZ 0004389 05*  
*Sarajevo, 29.12.2025. godine*

**SUD BOSNE I HERCEGOVINE**  
**Sudija za prethodno saslušanje**

*Na osnovu odredbi člana 35. stav 2. tačka i), člana 226. stav 1. i člana 227. Zakona o krivičnom postupku Bosne i Hercegovine (ZKP BiH), podižem*

**O P T U Ž N I C U**

**Protiv:**

- 1. JEVTIĆ DRAGANA**, rođen 1965. godine u Zvorniku, državljanin BiH i R Srbije,
- 2. BOGIĆEVIĆ SLAVKE**, zv „Brko“ rođen 1955. godine u Zvorniku, državljanin BiH,
- 3. LAZAREVIĆ DAMJANA**, rođen 1953. godine u Zvorniku, državljanin BiH.

**Zbog postojanja osnovane sumnje da su:**

*za vrijeme široko rasprostranjenog i sistematičnog napada preduzetog od 11. jula 1995. do 01. novembra 1995. godine od strane pripadnika VRS-a i MUP-a RS, usmjerenog na pripadnike bošnjačkog naroda u zaštićenoj zoni UN-a Srebrenica, tokom kojeg napada je izvedena operacija trajnog i prisilnog preseljenja cjelokupnog bošnjačkog civilnog stanovništva, operacija zarobljavanja, zatvaranja i pogubljenja vojno sposobnih muškaraca bošnjaka i dječaka iz srebreničke enklave, te operacija njihovog ukopa,*

iskopa, te ponovnog ukopa na drugim lokacijama u cilju sakrivanja dokaza, na koji način je djelimično istrijebljena skupina bošnjačkog naroda pri čemu je cjelokupno bošnjačko civilno stanovništvo, do 40 000 civila bošnjaka uklonjeno iz srebreničke enklave, a više od 8000 muškaraca bošnjaka i dječaka ubijeno, zakopano, otkopano i premješteno na druge lokacije pa ponovo zakopano, svjesno pružili pomoć članovima udruženog zločinačkog poduhvata između ostalih generalu „(...)“, komandantu GŠ VRS, pukovniku „(...)“, načelniku za bezbjednost Glavnog štaba VRS, potpukovniku „(...)“, pomoćniku komandanta za bezbjednost Drinskog korpusa, pukovniku „(...)“, komandantu Zvorničke brigade; potpukovniku „(...)“, zamjeniku komandanta i načelniku štaba Zvorničke brigade; poručniku „(...)“, pomoćniku komandanta za bezbjednost Zvorničke brigade, „(...)“, pomoćnik komandanta za bezbjednost i obavještajne poslove Bratunačke brigade; „(...)“, **načelniku inženjerije Zvorničke brigade**, te raznim drugim pojedincima i vojnim i policijskim jedinicama, uključujući jedinice Drinskog korpusa, jedinice Glavnog štaba VRS, jedinice MUP-a RS, a čiji plan i cilj je bio da zatvore i po kratkom postupku pogube i zakopaju vojno sposobne muškarce Bošnjake iz srebreničke enklave, a prisilno premjeste žene, djecu i starce iz enklave, i na taj način ih unište kao grupu, tako što su:

1. U periodu od 12. jula 1995. godine, dok je u toku bila operacija ubijanja grupa od više stotina zarobljenih muškaraca i dječaka bošnjačke nacionalnosti iz „Zaštićene zone UN-a Srebrenica“ koji su prethodno prisilno dovedeni na područje općine Zvornik, svjesno i voljno uzeli učešće u navedenoj operaciji masovnih ubistava zatočenika i to **Dragan Jevtić** u svojstvu vd komandira Inženjerijske čete 1.Zvorničke pješadijske brigade Vojske Republike Srpske, **Slavko Bogičević** u svojstvu **pomoćnika komandira za moral i vjerske poslove**, ujedno zamjenik komandira Inženjerijske čete i **Damjan Lazarević** u svojstvu komandira voda Inženjerijske čete 1.Zvorničke pješadijske brigade, a od 19.09.1995. godine ujedno i zastupnik komandira Inženjerijske čete 1.Zvorničke brigade, zajedno sa drugim, njima poznatim pripadnicima Inženjerijske čete, tako što je:

**Dragan Jevtić** izdavao naređenja i prenosio naređenja njegovih nadređenih iz komande Zvorničke brigade, između ostalih načelnika inženjerije majora „(...)“, komandanta Zvorničke brigade „(...)“, Načelnika bezbjednosti Zvorničke brigade „(...)“, da se izvrše pripreme prije ubistava zatočenika na lokacijama za njihov ukop, kao i pripreme teške građevinske mehanizacije, te kopanje prostora za masovne grobnice, što je podrazumijevalo naređivanje pripadnicima Inženjerijske čete da izvrše pripremu i

*dopremu bagera i ULT mašina na mjesta egzekucija, zatim osiguravanje neophodnog goriva, te organizovanje ljudstva i mašinista za rad na kopanju jama prije i tokom ubijanja zarobljenika, da se u toku i odmah po završetku ubijanja izvrši ukop osoba lišenih života, upotrebom teške građevinske mehanizacije, koje naredbe su:*

*Slavko Bogičević i Damjan Lazarević provodili izvodeći pripremne radnje ukopa i samog ukopa ubijenih dajući konkretna uputstva na terenu pripadnicima Inžinjerске čete Zvorničke brigade VRS-a, tako što su lično na lokalitetima određivali precizne pozicije za kopanje primarnih grobnica, izdavali usmena uputstva mašinistima za kopanje i zagrtanje masovnih grobnica, te neposredno rukovodili procesom ukopavanja tijela ubijenih u jame radi prikrivanja tragova neposredno nakon izvršenih strijeljanja, te su na ovaj način u periodu između 12. jula i 18. jula na području općine Zvornik:*

- na lokalitetu **Orahovac-Lazate** 1. i 2, dana 14. i 15. 07. 1995. godine izvršili kopanje masovne grobnice i ubacivanja u istu tijela ne manje od 860 (osamstotinašezdeset) zarobljenika;*
- na lokalitetu **Petkovci, brana Crvenog mulja**, dana 15. i 16. 07.1995. godine, izvršili kopanje masovne grobnice i ubacivanja u istu tijela ne manje od 815 (osamstotinaipetnaest) zarobljenika;*
- na lokalitetu **Kozluk-Šljunkara** na obali rijeke Drine dana 16.07.1995. godine, izvršili kopanje masovne grobnice i ubacivanja u istu tijela ne manje od 844 (osamstotinačetredesetčetiri) zarobljenika;*
- na lokalitetu **Pilica-Branjevo** dana 16. i 17. 07. 1995. godine izvršili kopanje masovne grobnice i ubacivanja u istu tijela ne manje od 1752 (hiljadusedamstotinapedesetdva) zarobljenika;*

*2. Tokom mjeseca septembra i oktobra 1995.godine, **Bogičević Slavko i Lazarević Damjan** zajedno sa drugim pripadnicima Inžinjerijske čete, ponovo po naređenjima viših starješina iz Zvorničke brigade i Glavnog štaba VRS, među kojima „(...)“, „(...)“, „(...)“, načelnik inžinjerije „(...)“, zamjenik načelnika bezbjednosti 1. Zvorničke pješadijske brigade Kapetan „(...)“, učestvovali su u organizovanom premještanju posmrtnih ostataka iz primarnih masovnih grobnica u tzv. sekundarne grobnice, koja operacija je bila sastavni dio masovnih ubijanja Bošnjaka i dječaka iz Zaštićene zone Srebrenica, na način da su:*

***Bogičević Slavko i Lazarević Damjan** upravljali konkretnim operacijama na terenu tako što su neposredno rukovodili pripadnicima čete pri otkopavanju primarnih*

*grobница i ponovnom ukopu tijela na nove lokacije, koordinirali izvođenje radova u dogovoru s organima bezbjednosti Zvorničke brigade i komandom Glavnog štaba VRS vršili organizaciju i angažovanje ljudstva uz nadzor nad tim aktivnostima, uključujući i lični nadzor nad radom teške mehanizacije pri formiranju sekundarnih grobnica i finalnom skrivanju masovnih grobnica, koje premještanje posmrtnih ostataka je ponovno uključivalo upotrebu bagera, ULT mašina i vojnih kamiona za prenos tijela, kom prilikom su pripadnici Inženjeriske čete iskopavali primarne grobnice, kao i nove grobnice u šumama i nepristupačnim terenima, često noću, a sve da bi se izbjeglo otkrivanje. Grobnice koje su premještene uključuju:*

- *Primarne grobnice Laze Orahovac 01 (LZ01), Laze Orahovac 02 (LZ2), Laze - Orahovac 02 (LZ2-B), Laze Orahovac 02 (LZ2-C), Laze Orahovac 02 (LZ2-R) premještene u sekundarne grobnice označene kao Hodžići (HZ3), Hodžići (HZ4), Hodžići (HZ5), Snagovo (ZV.SNA-01), Snagovo (ZV.SNA-02), Snagovo (ZV.SNA03ZVO-III), Snagovo (ZV.SNA04ZVO),*
- *Primarna grobnica Brana crvenog mulja je premještene u sekundarne grobnice označene kao Liplje 01(LP01), Liplje 02(LP02), Liplje 03(ZV.LIP-03), Liplje 04(LP04), Liplje 07 (ZV.LIP-07),*
- *Primarne grobnice u Kozluku označene kao KK1, KK2, KK3, KOZ04 ZVO premještene u sekundarne označene kao Čančari 07 (CR07), Čančari 02 (CR02), Čančari 3 (CR3), Čančari 13 (CR13), Čančari (CR01-KAM14ZVO),*
- *Primarne grobnice Pilica (PLC) i (BRA01ZVO) – premještene u sekundarne grobnice označene kao Čančari 05(CR05), Čančari 04(KAM04ZVO), Čančari 06(KAM06ZVO), Čančari 08(KAM08ZVO), Čančari 09(KAM09ZVO), Čančari 10(KAM10ZVO), Čančari 11(CR11), Čančari 12(CR12).*

**Dakle,**

**Jevtić Dragan, Bogićević Slavko i Lazarević Damjan** radnjama opisanim u dispozitivu optužnice znajući za namjeru glavnih izvršilaca da djelimično istrijebe nacionalnu, etničku i vjersku skupinu Bošnjaka, pomagali i podržali ubijanje muških pripadnika skupine Bošnjaka i nanošenje teških tjelesnih ozljeda i duševnih povreda skupini Bošnjaka, koji su, kao Bošnjaci Istočne Bosne, činili značajan dio etničke skupine Bošnjaka.

**Čime su:**

**Jevtić Dragan, Bogičević Slavko i Lazarević Damjan pod tačkom 1.** počinili krivično djelo Genocid iz čl.171. tačka a) i b) KZ BiH u vezi sa članom 180. st.1. i čl.31. KZ BiH, a **Bogičević Slavko i Lazarević Damjan pod tačkom 2.** počinili krivično djelo Genocid iz čl.171. tačka a) i b) KZ BiH u vezi sa članom 180. st.1. i čl.31. KZ BiH.

**TUŽILAŠTVO/TUŽITELJSTVO BiH  
TUŽITELJ**